

Chhuah ĩan: Oct., 1984

NOVEMBER, 2016

RAMTHAR



**KOILAMATI KOHRAN BIAK IN
Karbi Anglong Mission Field**

**SERMON
KRISTA AVÁNGA TUARNA.....phêk 3 - 5**

RAMTHAR ASSOCIATION CHANCHINBU THLA KIP CHHUAK

EDITORIAL BOARD 2016 - 2018

Editor	: Rev. Thangzauva	9612950043 (M)
Joint Editors	: Dr. Robert S. Halliday	9862374232 (M)
	Upa Zoramthanga	9436362385 (M)
	Pi C. Lalrampárl	9436190803 (M)
News Editor	: Pu Lalbiakênga Fanal	9436366234 (M)
Cir. Manager	: Pu Lalawmnakima Hmar	8575178109 (M)
Publisher	: Rev. K. Lalrinmawia	9485140409 (M)

Member-te

Rev. H. Lalrinmawia	: Synod Moderator
Upa H. Ronghaka	: Synod Secretary (Sr.)
Rev. B. Sangthanga	: Executive Secy. I/c Mission
Rev. Lalremruata Ralte	: BEC Member
Upa H. Thangmawizuala	: BEC Member

Thu chhuah tûr nei chuan Email - ramtharchanchinbu@gmail.com-ah emaw, lehnam chauhvah ziakin Editor emaw, Cir. Manager, Ramthar Chanchinbu, Synod Office, Aizawl, Mizoram (India) hnênah emaw thawn tûr a ni e.

Ramthar Chanchinbua thu chhuah hi a ziaktu mawhpurhna a ni.

SYNOD MISSION BOARD HOTUTE:

Rev. B. Sangthanga	Executive Secretary	9862374232
Rev. K. Lalrinmawia	Secretary	9485140409
Dr. Robert S. Halliday	Coordinator	9436372139

KUM KHAT LÂK MAN - ₹ 50/-
A CHHÛNGA THU AWMTE

1. Editor thukhawchâng	- 1
2. Keimahni	- 2
3. Sermon	- 3-5
4. Zawhna	- 5
5. BUHHMUN AṬANGIN:	- 6-14
(1) Cambodia ramah Kohhran enkawltu...	
(2) Lalpa thatzia hi tem chhin ve teh reng u	
6. Silchar Mission Compound	- 15-19
7. Ramthar Feh	- 20-29
8. Tv. Zothansanga kan then ta	- 30-31
9. Declaration	- 32

BUH SENG HUN

Thuhriltu chuan, *‘Engkim tán hian hun ruat a awm a, Vàn hnuaia thiltih zawng zawng tán hun remcháng a awm,’* (Thuh 3:1) a ti a. Hun bi nei, a hun laia tih loh chu - *‘Phengphehlepa khua a tlai zo ta’* tihin mi a nan chuan a pawl thui thei thin. Chutiang bawkin buh pawh hi a seng hun a awm a, a seng hun laia seng loh chu **ṭàmna** a ni mai.

Zawlnei Jeremia chuan a miten hun ṭha an bawhpel avànga an chung a thil ṭha lo lo thleng tùr hetiangin a sawi: *“Buh seng hun a liam ta, Nipui a tàwp ta, chhandamin kan la awm lo!”* (Jer 8:20) tiin. Chhandamna atán, LALPA hnêna kîr huna kîr loh pawizia a sawi chhuak a ni.

Lo neia ei zawng thin chuan buh seng laia ṭul a natzia kan hre theuh àwm e. Buh seng aia ṭul dang a awm thei lo. Lal Isuan, *“Mitthiin anmahni mitthi chu vui rawh se; nang chuan Pathian ram thu va hril darh zâwk rawh,”* (Lk 9:60) a tih chhan pawh hi Thlarau lam buh seng chu thil dang zawng aia a dah pawimawhzia a sawina niin a lang.

Lal Isuan, *“‘Nangnin buh sengna tùr thla li a la awm’ in ti lâwm ni? Ngai rawh u, tân apangin seng tùrin a êng a ni,”* (Jn 4:35) a ti a. He thu hian tân hi buh seng hun, thlarau bo chhanchhuahna hun ṭha a nihzia a tilang. *‘Kan vèlah buh lâk tùr tam tak a hmin ta e’* (KHB No 390) tih hla phuahtu Pu Laibâta pawh hian Lalpa tâna buh seng a hunzia, a hmanhmawhthlâkzia a sawi Chiang hle mai. Judan, *“Thenkhat mei ata la chhuak thuai ula, chhandam rawh u,”* (Juda 23) a tih pawh hian thlarau bo, hremhmun meipuiin a kan ral mék la chhuak tùra hmanhmawh a ṭulzia a sawi a ni. Ramthar rawngbâwlina hmunah chauh ni lovin, ni tina kan chaw kîlpui te, kan thenawmah te, kan khawtláng leh ram chhúngah te pawh thlarau bo seng khâwm tùr a tam hle. Mi tam tak chu an hun ṭha a liam mék a, hmanhmawh a ngai hle.

Ezekiela chuan mi suaksual chu a sualna ata hawikir tîr tùra vaukhâna thu sawi a nih loh chuan Lalpa thu hretu lakah chuan chu mi thisen mawh chu phûl a nih tùr thu a sawi. Mahni theuh inkâwkin, inbel ila, thlarau lam buh seng tùrin hun ṭha a liam hma hian i thawk thuai thuai ang u.

K E I M A H N I

† TUARPUINA:

1) Upa A. Kailiana (73), Sairang Dinthar Kohhrana Ramthar Chanchinbu Agent chuan ni 13.06.2016 khán Stroke avàngin chatuan ram min pansan.

2) Pi Lalbuatsaihi, Evangelist, Kameswar (Tripura) nu, Pi Thangzovi (85), Chhiahtlang Sailam khua chuan ni 17.08.2016 khan Pum ná avàngin chatuan ram min pansan.

3) Pi Lalthlahlovi, S/N, Noagang (Tripura Mission Field) nu, Pi Rosiami (75), Chanmari, Aizawl chuan ni 29.09.2016 khán zunthlum natna avàngin chatuan ram min pansan.

4) Pi H. Laldawngliani, Office Assistant (SMB Headquarters Office) pa, Pu H. Sapdawla (84), Maubawk chuan ni 3 October, 2016 khán *stroke* avàngin chatuan ram min pansan.

5) Pu Lalthakima Ralte, Evangelist, Nazat (Kolkata Mission Field) pa, Pu Lalngaihawma, Chaltlang, Aizawl chuan ni 11 October, 2016 khán Cancer avàngin chatuan ram min pansan.

† **CHAKMA HLA BU PEIH:** Chakma Hla bu endik chu peih fel niin Press-ah chhuttir mék a ni a. Hla bu hi a man chanve (₹ 50/-)-a hralh tura ruahman a ni.

† **SYNOD MISSION CHOIR:** Synod Mission Choir member-te Patna Mission Field, Lucknow Mission Field leh Assam Mission Field-ah te zaia rawngbáwlin an kal a; thawktute leh an thawhnaa miten an hlut hle.

† **CHAKMA HLA BU PEIH:** Field hrang hranga Favang Field Committee chu Pathian hruainain tluang taka zawh fel a ni. Thawktute inpèknain Field leh Board lama hotute rilru a hneh hle bawk.



SERMON KRISTA AVANGA TUARNA

R. Vanlalvena, Bungkawm

Kan rawngbáwtute zingah hian Pasalṭha huaisen tak tak an tam a, kan hriat lêm lohah te thleng hian an inphum ru ṭeuh mai. Pathian thu avànga rawngbàwlṇa thila tuarna tam tak pal tlang, thil phah hial pawh an tam mai. Tuarna hi a tuartuin a tawrh chhan a hriat chian chuan ṭap chung pawhin lâwm takin a tuar thei ṭhin. Hêng mite hian an tawrh chhan - Pathian an hriat chian vâng a ni.

Tuarnain thianghlīmna a pe a, harsatna leh hrehawmna kárah pawh chhelna a pe a. Chûng mite chuan ṭahna ruamah pawh tuihna awmna an siam ṭhin. Hei hi Lalpa lâwm zâwng tak a ni. Tuarna hi tu tán maha siam a ni bîk lo va, tuar tùr hrim hrima thlan chhuah an awm hek lo. Tute chhúngkuaah emaw thihna te leh vanduaína te a lo thlen hian kan teh fo ṭhin; tuar tlâk ni hial tein kan sawi ṭhin. Ringlote chauh hi khawvêla tuarna hmu tlâkah kan dah fo ṭhin.

Tuarna hi sawi fiah thiam a har a, kan chung a lo thlen hian vanduai ta bîk riauvah te kan inngai fo ṭhin. Ringtu tán chuan tuarna hi thilpêk

hlu tak a ni tlat; chhelna siamsaka, beiseina nung leh hriat fiahna a neihtir a, tuarna phena malsâwmna tam tak awm chu a thlirtirin engkim-ah a tána hlâwknaah a chantir thei ṭhin.

Novan Pathian thupêk anga Lawng a tuk chhúng kha a rei hle mai. A hun chhúng khán a chungah tawrhna a thleng tam hlein a rinawm. Rilru lam tuarna - miin 'mi â' an ti mai ang em? Nuihsawhtu, hmusittu, elsèntu an awm ang em? Hêngte hi a tán chuan tuarna, rilru chhúnggrila beiseina tibotu a ni ngei ang. Pathian âw lah ni tinin a hre baw si lo Pathianin vawi khat a hrilhna kha a pawm mai si a, Pathian âw nghah leh

deuh duhna a nei angem? An
va han tuar nasa êm!

Abrahama hian ‘*Rinna Pa*’ nihna hi kum khat
chhúng leka a hlauh
chhuah a ni lo asin! Koh
chhuah a nihna ațanga a
pa In a chhuahsan hnua, h,
kum 99 a nihin thutiam fa,
Pathianin a pe chauh. A
kára hrehawmna leh
tuarna tam tak a pal tlang
hi chhut chhuah chi pawh
a ni lo. A mangangin Lalpa
hmaah Ismaela a hruai a,
Pathianin a lo pawm teuh
mai si lo; a beidawnthlâk
âwm teh e. Chutah fapa
Isaaka a lo piang a; hàlrâl
thilhlana hlan tùrin a ti leh
ta mai si. “*Abrahama hian
Pathian lakah thil sual a ti
a ni ang?*” kan ti ang em?

I tuarna, i țahpui leh
ka tuarna, ka țahpui țhin
nèn tehkhin ila kan va tuar
nêp si êm! Tawrhna
hmachhawn tùr hi chuan
ringtu piangthar țha,
beidawng ve mai ngai lo,
Lalpa en tlat țhin, khawvêl
hnungchhawn tlat mi hi an
va thlanawm êm! Ringtu
derthâwngah chuan thleng
lo hrâm se a țha hle mai.

Josefa, a hlauhlinna
tùra chher chhuah a nih
dân hi a va han thlanawm
loh êm! Ka thlan tùr ni se
tu mahin kan thlang lo vang
tih ka ring. A tãwpa a
dinhmun erawh kan
dinhmun ni se kan duh hle
ang. A pianpui unaute
ngeiin an ngeih loh, sâla an
hralh hial a ni a. Chuta a
hun kal zêlah nawmsakna
a nei dawn chauhva
vanduainain a tlâkbuak leh
a. Pathian pawl a sawi em
ni? Kan tûnlai dinhmun
angah hi chuan Pathian
hremna a tuar kan ti ngei
ang. Pathianin mi a tun din
dawn hi chuan kawng a lo
va thlang uluk êm! A mi ni
tùr chuan mi nghet,
rinawm, tuirol mai mai lo,
miten hrethiam lova an
nuihzat nih te a ngai țhin.
Lalpa, i thil tum dân hi kan
va hre lo êm!

Tûnlai angah te hi
chuan ringtu țha nih kan
duh a, tuarna pumpelh kan
duh a, tuarna hi hremnaah
kan ngai tlat a, mi sualte
chauh hi tuar tùrin kan
ngai a; Pathian ringtute chu
an chung a tuarna thleng ve
lo tùrin kan ngai țhin.

Hêng mite avàng hian mi tam takin ringtute chu malsàwmna hli a vûr tùr angin an ngaih phah thin. Amah ringtute tawrh hi Lalpa hian a phal teh asin! Lal Davida pawh kha a naupan têt lai aṭangin Lalpa hruaina leh enkawlina a dawng a, chinghnia, savawm leh Goliatha, mi chak te pawh a lo hneh tawh thin a. Mahse, mi chak lo leh áwm ném tak hmeichhe lakah a

tláwm dêr mai a ni. Lalpa lak aṭangin a chungah tawrhna a lo thleng tak tak mai chu sawi sèn a ni lo.

Mahse a tuarna zàn thim chhah tak mai chu a pawm thlap a, Lalpa lam a hawi tlat, Pathian thinlung ang pu mi-ah a chhuak leh thei ta a ni. Unau duh tak, i tawrhna kha Lalpan a phal. Lalpa hnaih nán hmang hlah rawh. Amen.



ZAWHNA

ZAWHNA: Kan Synod hian hmun hrang hrangah Mission Compound a nei ve ta a, a làwmawm hle. Hêng hmunah te hian thawktute leh an chhúngte an chêng a, kut themthiamna chi hrang hrang nei, entír nán, Mistiri te, puan thui thiam te, pawh an awm ve ta nual mai a. Hêng kut themthiamna nei chi hrang hrangte hian ‘rawngbàwlina aláwm’ tiin man tlém tê tēin mi thil an siamsakin a thuisak thin a. Hemi chungchángah hian kan Synod Mission Board ngaihdân eng nge ni? Kan Synod Mission Board hian hetiang thil hi a phal lo hrin hrin nge, rawngbàwlina átán a phal? Rawngbàwlinaa ngaia man tláwm tê tēa mi thil an lo tihsak hi anmahni tanpuina leh tihhmasáwnna te, thiana siam theihna kawng awlsam tak te a ni hawk si a.

- PC Lalrinmawia Zotlang, Aizawl

CHHANNA: Zawhna tha tak leh pawimawh tak a ni. Synod Compound-ah hian sumdawnna lam thil kawl phal a ni lo va. Synod-in a aiawha Compound thuneitu a dah apiangte kaihhruaina zâwm zêl rih phawt mai tùr a ni e. Keini Mission hi mission dangte ang lo taka inthununna (discipline) mumal tak nei kan ni a. Kan invawnna dân neihte hi a tha famkim lo mai thei a, a changkâng tâwk lo mai thei e. Mahse, kan tlîn tlân tùr leh min hrút rual tùra kan rêt thiam tâwk a ni rih miau a nih hi maw!

**BUHHMUN AṬANGIN
CAMBODIA RAMAH KOHHRAN ENKAWLTU
(PASTOR), A KOHHRAN ENKAWL MÊK NÈN KAN
LÂWM LÛT**

Rev. Sairengpuia Sailo

Kum liam ta lam daih tawh aṭangin United Pastor Fellowship aṭanga kan hmelhriat Pastor Soun Chandareth-a hian *Factory worker*-te zinga rawngbâwlpui atân kan Mission min sáwm ṭhin a. Pu Dareth-a hi Pastor chu kan han ti tak nâ a, kohhran enkawl a neih avànga Pastor tih ve a ni mai a. Nem ngheh pastor tak tak chu a ni lo, *independent* kohhran pakhat a din leh a enkawl avàngin Pastor an ti ve mai a ni. A nupui hi *Factory worker* hnathawk ṭhin a ni a (*tûnah chuan sangha a zuar a*). A nupuia pa leh unaupa 2 pawh kohhran enkawl nei Pastor an ni.

Pu Dareth-a hian Pathianni tûk khat chu Pathian âw a hria niin a insawi a; Pathianin rawngbâwl tùrin a ko ni tlatin a hria a. A nupui leh a fa (*chutih lai chuan 2 an ni*) te nèn chuan an inah chhúng inkhâwm an nei a, an zai ri te chu ṭhenawmtan an hria a. A Pathianni leha chuan ṭhenawm leh hmelhriat *factory worker*-te an sáwm khâwm a, an inah chuan an inkhâwm ṭan chu a ni ta dêr mai a. Pu Dareth-a te unaupa,

Kristian ṭha tak mai leh zai hruai thiam tak chuan a rawn pui ta bawk a. An kohhran chu an pung chak hle mai a, mi 60 emaw lai chu Pathianni apiangin an inkhâwm thei ta a. An kohhran hmingah chuan **'Born again Church'** an vuah nghe nghe a.

Nimahsela an unaupa chuan Province lamah hna a hmu ta hlah mai a, a kalsan a ṭul ta a. Pu Dareth-a te pawh chuan hna avàngin an awmna

veng an sawn a ʔul baw k a, an awmna veng thar lamah chuan inkhâwmna neih chhunzawm mah sela inkhâwm tûr an nei tam thei ta lo va, pali/nga vêl lek te an inkhâwm ʔhin. Chuti chung pawhin beidawng duh hauh chuang lovin an kohhran enkawl chu an kalpui zêl a. Kan Mission nêna thawh ho hian kohhran nung leh chak tak an din leh theih hi a beisei êm êm mai a, chuvàng chuan thawh ho puiah min sáwm ʔhin a.

Thawh hona (*partnership*) hnuaiah Cambodia-ah hian ‘*United Pastor Fellowship*’ leh ‘*School of Discipleship*’ bâkah kohhran mal ‘*Church of Christ*’ kan thawhpui mék a. Kohhran mal thawh hopui leh chu Cambodia SMB staff te chuan a ʔul kan ti rih lo va. Nimahsela, kan kohhranah intiamkamna eng mah awm lova lo lût duh an awm a nih chuan a ʔha e, kan ti a.

Ticuan, Pu Dareth-a hnênah chuan minrawn zawm dawn chuan amah

leh a enkawl mék kohhran chu Presbyterian kohhran an nih a ngai dawn a ni tih te kan hrilhfiáh a. Pu Dareth-a chuan a kohhran enkawl ve mék chawpa kan kohhrana lo luh pawh chu a hnial lo ta zêl a. Cambodia SMB staff committee chuan kan ngaihtuah a, fimkhur deuh a ʔha ang, tiin kan han nghâk leh renrawn a.

Pu Dareth-a chu ‘rawih kan ba lo’ tih te, ‘eng mah kan Mission-in kan tiam thei lo’ tih te kan hrilhfiáh leh vek hnuah pawh kan kohhrana rawn luh an la duh cheu avàng leh, kan tlai lam inkhâwmna (*evening house Church*)-ah eng emaw chen an chhúngkua chu an rawn inkhâwm tak avàngin lâwm luh mai ʔhain kan hria a. Ni 14 August, 2016 khán Presbyterian kohhranah kan lâwm lût ta a ni.

Pu Dareth-a te chhúngkua kan lâwm luh rual hian, an kohhran lo enkawl ve mék **Born Again Church** member rawn inkhâwmte pawh chu kan lâwm lût tel nghal a. An

kohhran pawh chu kohhran thar “**Presbyterian Fellowship, Chamchao**” a lo ni ta tih kan puang nghal bawk (*‘Chamchao’ hi an awmna veng hming a ni*). Pu Dareth-a hi Pastor angin kan làwm lût lo va, kan *fellowship* inkhâwmah pawh Pastor angin chanvo kan ruatsak ngai lo.

Tûnah hian Chamchao-a kan *fellowship* thar hi Pathianni (8:30 a.m.) apiangin kan missionary-ten an va inkhâwmpui thin a, Pu Dareth-a te in luah lai mékah inkhâwmna hi kan nei thin. *Factory worker*-te hipna atân Ni 4 September, 2016 aţang khân Sâp ţawng zirna (*Spoken English class*) kan kalpui ţan ta bawk a.

Inkhâwm hma dârkâr khat chhúng kan missionary-ten English an zirtîr a, English rawn zir *factory worke*-te chu an inkhâwm ngei ngei an phut thung a. Ringlote pawh an rawn kal ţan hlawm a, Pathianin mal min sâwm zêl kan beisei.

Hei bâkah hian *Factory worker*, rethei leh harsa zual tak takte tâna In luahsak zâwnga rawng-bâwlna kalpui hian awmzia a nei hle dawnin kan ring bawk a. Hêng lai hmuna inte hi *factory worker*-te luah theih tûrin a chhâwng (*floor*) tinah pindan (*room*) mal tê têin an siam hlawm a. Pindan tinah hian *electric* leh tui *connection* pawh a hrangin a awm vek hlawm a. Hetiang in chhawng hnihte kan luah vek theih chuan pindan 10 emaw lai a awm thei ang.

Chutiang kan in luaha khawsa, *factory worker*-te chu in luah man tlêm zâwk lâksak ila; ni tin Pathian thu kan zirpui thei thung ang a, Pathianni inkhâwmah *regular* takin kan inkhâwmtir thei bawk ang. Chamchao-a kan *fellowship* pawh a mumal sawt theih a beiseiawm a. Hautak lutuk lovin he rawngbâwlna hi kalpui theih kan beisei hle a, kawng kan dap mék bawk.

Hetiang zâwnga *factory worker*-te zînga rawng-

bàwlna kalpui hi an la awm lo niin kan hre bawk a, Lalpan kawng min hawnsak zêl kan beisei hle a ni.

Chamchao veng hi *Airport* hnaih, khawpui pawn lam deuhva awm a ni a, kan *Dormitory* ațangin 12 Km vêl zeta hla a ni. A kal vêlna a hautak hle a, chuti chung chuan kan Missionary-te phur takin an che vêl thei reng a, a làwmawm tak zet a ni. Tlai dâr 6:00-ah kan *Dormitory House Church*-ah kan inkhâwm leh țin. Hemi inkhâwmah hian Pu Dareth-a te chhúng pawh chhangchhe tak chungin an lo tel ziah thei a, *factory worker* Kristian ni lo, mi 10 chuang laite an rawn hruai cháng pawh a awm țin.

Inkhâwm tùra hêng mite lo kalna man hi a hautak tham hle. Chu mai ni lovin, kan tlai lam *Dormitory House Church* inkhâwmah hian zanriah kan ei nghal ziah bawk.

Hêng atán hian Mission sum kan la hmang ngai lo, kan *fellowship* thawhlâwm leh kan Pathian ram ținghkhâwm kan hmang ve mai țin.

Cambodia rama SMB rawngbàwlina hian hma a sâwn chak lo hle mai a, thawktute pawh kan insit khawp mai. Khawvêl *mission* hrang hrangin rusûm an thlâk sup supna hmunah rinkai taka rawngbàwlina kalpui thiam a har hle țin. Khawthlang missionary-te leh Korean Mission te anga sum lam hmachhuan tùr nei ve lo kan nih avàngin hma lâk thiam pawh a har a.

Heti chung a kan làwmna tâwk rawngbàwlina kawng lo inhawng ve zêl erawh hi chuan min tilâwm êm êm a ni. Kan mamawh ber chu Thlarauva rawngbàwl a ni a; chu chuan thiltihtheihna a keng a, Zoram kohhrante ținwngtai-puina kan mamawh tak zet zet a ni.

† “Lalpa, Thlarau Thianghlina min tikhkhat loh zawngin Missionary ka ni zui zêl tawh dawn lo.”

– John Hyde-a

LALPA THATZIA HI TEM CHHIN VE TEH RÊNG U!

*Liansangpuii Renthlei
Evangelist, Bidhupur*

LALPA min kohna, a hmangaihna hre lote hnênah a hmangaih thu puang chhuak tùra zawi tê, ring tak si leh nêam tak, khauh tak sia min kohna chhân loh theih lohva ka pên chhuah ve-na pawh kum tam la ni lo mah se, miten nghawng pil lek leka an dai leh an pal tawh laia Lalpa rawngbâwnaah ke-artui kan rap pil ve tan dèk dèk chauh nachungin he kum li hmél ka hmuh ve dèk dèk chauh chhúng hian a thatzia sawi tùr ka va ngah ve êm! Bul tantirh lam chu lo dah tha ta ila

January, 2016-ah thingtláng aṭanga tléma kawngpui zau lamah min sawn chhuak a. Huphurh angreng tak, phur tak chung siin bul kan tan thar leh chu ni a. Hmun thar, ringtu awm lohna hmun a ni a. Kum hmasa lamah a huhovin feh chhuak lâwp lâwp mah ila mihring inhawn lohna leh a veng chhúng boruak tha lo dang dang vângin beisei a sang lo hle bawh si.

Mahse, Lalpan chu hmunah chuan hotute kaltlangin, “*I awm a tul a ni*”min ti mauh mai. Ka enkawl lai, ka fate (ring thar) nèn ui ngawih

ngawihin mittui nèn kan inthlahliam ve a. Mahse Lalpa remruat hi a fel thin; an mahnî enkawl zui thei tùrin hotute kal tlangin Lalpan min húng leh zêl si. Ka va lâwm êm! Ka tlangnèlna leh ka eiin tùr “*khawî mau*”tih theihna hmun, awm hmun hmasa chhuahsanin hmun tharah chuan kan inbengbel ta. Ni sáwm chauh ka awm ve hman tihin In thar luah leh a ngai a; thla khat chhúngin ka lût leh chhuak chhiar telin bungrua wawi li ka pack hman a ni.

Chu hmélhriat loh khuuaa mahnîa ka vah rak rak hnu thla khat leh ni 16-

na chiahah Lalpan thawhpui tùr, Nl. P.C. Lalnunsangi (*Au Masangi*) min pe a. “*Chutah khatah kan member-te nèn kan inkhâwm*”emaw “*Chumi khami chu kan member Rajkumara a ni a*”tia lo kawh hmuh tùr eih awm sa bîk hek suh; a lo thleng tîr pawh a rawn bangbo ve nghal hle mai. “*Hotuten min ring tâwk a; hei, hmun tharah bul tan thara kan len te deng tùrin min dah a ni a. A nuam emaw, a hrehaum emaw huai takin kan bei dun ang chu,*”tih bâkin lo hmuahna tùr ka nei si lo. Pathianni a lo thleng a, kan in en renrawn a. Kan thu niléng ve tawp, inkhâwm-pui tùr kan nei si lo va.

“*KHAWI NGE*”tiin ni khat chu kan la kal ngai lohna hmun km 4 vêlah kein kan vâk chhuak a. A ngaihna hre lova kan kal mawp mawp laiin damlo pakhat min tawntîr a. Kawng sir khuma lo mu bâm chu, “*Kapi, i damlo em ni?*”tiin kan zâwt a, kan tawngtaisak bawk a. Chuta tang chuan Lalpan

hmélhriat min pe a, inleng min neihtîr ta a. Inkhâwm-pui tùr rei tak nei lova kan awm hnuah pakhat tê tîn min sàwm khâwmsak a; mahse a châng a rei tak kan nghaha Pathianni nilénga kan lo thlir hlwhchham ni a awm tho mai. Chu beidawnna kârah chuan kal chhet chhetin, a tûkah kan vak chhuak leh tho thin.

Ni 22 August, 2016 káwl a lo êng a, a hmasa ber atán Baptisma chang kan nei ve ta. Tuna Baptisma chang tlangval (Prem Raj-a) hi kan hriat hmain, amah hringtunu chu Kristian a nih thu kan hmélhriatten min hrilh a. Kan va zawn chhuah chuan an in lama inkhâwmna buatsaih tùrin min ngen nghal ta tlat mai. Kan ni tin hun hman dân (*routine*) siam remin March thla ațangin Zirtawpni tlaiah an kawt, Anganwadi-ah chuan naupang A B C leh **k K ga** zir zawh hun hunah kan va inkhâwm ta thin a ni. Chu mi hnu thla nga a liam pawh chuan ringthar hmél kan la hmu mai thei bîk lo. Mahse kan va inkhâwmna nu

kristian inti pawh chuan,
*“Ka Kristian nun bo hnu
 chhan chhuah leh a awm.
 Rawn lang lo ta ula chuan
 ka nun leh ka fate nun hi a
 bo mai dawn a ni si, ka va
 lâwm êm!”*a ti ve hial mai.
 Chhan nei lo hian Lalpa
 hian englai mah hi min
 rahtir ngai lo asin. A va tha
 tehlu êm! Ringthar erawh
 kan neih belh nghal ùam
 ùam chuang lo.

Mahse, he hmunah
 hian Lalpan inkhâwm tùr
 mi 40/50 te min pe ve asin.
 An duh tui a, thu an
 ngaithla uluk a, zawhna an
 zâwt peih a, hla sak nuam
 an ti êm êm bawk a ni. Ni
 khat chu Prem Raj-a
 chuan, *“Lal Isua ka zui ve
 duh, duhthlanna ka siam
 fel tawh. B. Tech zirlai ka
 ni a, ka zirna hmunah kal
 leh a ngai tawh bawk si.
 Ka kal hmian Baptisma ka
 duh e,”*a ti ta a.

Tin, kan awmna ațanga
 km 4 vêla hlâa chêng, Pi
 Sita Devi chu a hmian kan
 awmnaah lo kalin țawng-
 țaisak tùrin min rawn ngen
 tawh a. Zawhna hrang
 hrang a zâwt a; Isua zui

tùra tih ngai te, zui hnua
 awm dân tùr te, milem
 pathian hmaa kùn a rem ve
 tawh loh thu te kan hrilh
 a. Kan inhrihl hnua
 harsatna tawrh leh pal
 tlang huamin, a hriat ve
 dân ang anga Lal Isua zui
 tùrin kum 70 râl a kai
 hnua *“Isu, nang chauh,”*tiin
 duhthlanna a siam ve leh
 ta bawk. (Amah leh Prem
 Raj-a te hian a hmia ber
 atân baptisma an chang
 rual ta a ni).

Thian duna kan
 vahvaihna ka ngaihtuah a:
 hotute hrilh ngam vek lova
 beidawna ruam kan zawh
 tamzia te, kan vâk chhuak
 - hah hnêpa kan awm laia
 Vai unauten min chhaih
 nawmnah thâwm leh min
 hmuhsitzia te. En mai
 pawha pasal neia fa te pawh
 nei rual tawh; zawng lai
 kan la ni tlat si, an
 hriatthiam si loh zia te hi
 âw! Mahse chu lam chu
 rilruah kan dah pawimawh
 ber lêm lo.

Mahni In kan thleng hi
 kan bawk thlawp a,
*“Engtikah nge ni ang,
 Lalpa?”*tiin zân tin fianrial

hun kan hmang a; Lalpa hi kan va au nasa ve êm! A tâwpah ringthar awm lohnaah Baptisma chang an awm avànga kan thiandun lâwmna hi miten an hrethiam kher lo vang. A tûk ni 25 August-ah Anganwadi-a kan va inkhâwmnaah ringthar tlangval 5 leh nutling damlo kan tawn hmasak ber, tawngtâina aţanga damna changte 2 nèn (*an vaiin mi 7-in*) Baptisma an chang ve leh ta. Ka hun tawna ka lâwmna leh hlimna a san ber tum a ni hial ang. Lalpa chu fakín awm rawh se. Hêng zawng zawng hi mihring tih a awm lo. Amah ngeiin ke min pênţir a ni. Kan kawng min hruaitu, Lalpa tthat vâng a ni.

*“Kawng harsa, kawng nuam a ni lo,”*tia kan hrilh hnu pawha, an chhúngkua leh khawtlang aţanga harsatna awm thei tûr hre reng chung a Isua an zui ngam hmél ka hmuh thin hian kei Missionary ai hian huaisen ka ti a ni.

Vâkvaiin, bangbo takin, bul tşan ngaihna hre

lovin, belh tûr eih awm sa lovin bul kan tşan a. Rawngbâwl ngai si, bâwl ngaihna hre si lovin, rinna leh beiseinain kan arkawh-chhuah ve tawp a. A tâwpah Lalpan ringthar Pathian thua chhum hmin thlap, mahni duhthlanna ngeia amah zuitu min pe hi kan lâwm a ni. Hmun dangah ringthar kan lo nei fo thin; mahse, tûn tumah hian **“a rah hi a thlum bîk”**hian kan hria a ni. Lalpa chu fakín awm rawh se.

Kan hma lâknaah hian fimkhur takin rawng kan bâwl a. RSS (*Hindu sakhua humhalhtu pawl - Rashtriya Swayamsevak Sangh*) hluarna a ni a, kan hmél ang chi hi inlan tam a tşha lo va. Mi mit lâk kan duh loh avàngin kan thiandun bâkin kan feh chhuak ngam lo va, mit leh beng chhi rana fimkhur taka awmin rawngbâwl na kan kalpui a ni. In ruak chenna tûr kan zawn lah a báng hek lo. Vawiin thleng hian thiandun bâk Mizo hmél dang kan la hmuhtir lo a ni.

Kal hùl hùl ngam lohna hmun hi a awm ve fo va, chûng hmunah chuan mi mit la lo tùr ang bera inzui duah duah loh a ngaihna hmun hi a awm chawk mai. Kan tih huka kan buai ai chuan, daih rei zâwka rawng kan bàwl theihna tùrin ruahmanna nei ila, a fuh viauvin ka hria. Chûng anih vâng chuan kan rawngbàwl tam berna hmun, Shipgance leh Andarwar (*Kan inkhâwmna, Km 4 vêla hla*) lamah hian kan thiandun bâkin (a huhovin) kan la kal ngam lo a ni. Theih ni se, a huhova kala, inhlím chhuah ve te a châkawm ve thin; mahse a rem si lo.

Chuti chung pawh chuan Police lamah *report* te a lo lût tho va; *Thana* lamah min koh tum a la awm

tho. Kan thian dunin kan va thu renrawn a, mahse zàmna rêng rêng hian hmun a chang lo. Lalpan chûng hunah chuan engkim min chinfelsak leh thin. **A hun lovah chuan min man lo vanga, min ti-na hek lo vang** tih ka hriat chian phah hle mai. Lei leh vãn Lalber a ni a, a ramin kin ni rêng a nei lo vang.

I beiseina a bo thin em? I tawngtai chhanna rêng rêng a lo thleng dawn lo emaw tih tùrin a reh vang vang thin em? Unau, beidawng lovin bei la, a lo thleng har a nih pawhin nghak la, beisei rawh. A lo lang mai ang. Kan Pa hi a rinawm asin. A tha asin! Belh chian a dâwl asin. **A thatzia hi han tem chhin ve teh rêng u.**

† “Fakna ropui ber chu mi bote leh tanpui ngaite zawng chhuak tura inpete ke pên thâwm hi a ni.” - Billy Graham-a

† “Mi sualte hremhmuna an tawlh liam mék laia nuamsa taka kan lo awm mai mai loh nán Pathianin min tanpui rawh se.”

- Charles Spurgeon-a

SILCHAR MISSION COMPOUND

Rev. Lalpianga

*Rilru lo ruahman lâwkna chu mihring chan a ni a,
Lei chhanna erawh chu Lalpa aţangin a ni (Thufingte 16:1)*

SILCHAR MISSION COMPOUND-A PATHIAN

HNATHAWH DÂN: Kum 1974 April ni 25 aţang khân Cachar ram hi kan Mizo Synod enkawl tûrin Assembly-in a dah a, chutih laia Mission Compound dinhmun chu a mak hle. Thenawmten bawng thlah nân an hmang a, Gate-pui luha ding lam, tûna School building awmna hi páwn lam mi tlángvalho inkhelhna hmun a ni a; vei lam, Biak In bul hi tleirawl inkhelhna hmun a ni. Sikul tual hi *cricket* vuakna hmun a ni a. A chhúnga in pahnih hi *hostel* atána hman a ni ve ve a, thingtláng aţanga College zirlaihovin an luah a. Páwn lam tlángvalhovin awm khâwm nân an rawn hmang thin, Compound-ah thu an nei hle a ni.

Bangalow-pui, tûna Biak Ina hman lai hi SIB-hovin Office atán an luah nghet hle mai a, neih hlen pawh an tum hle a ni. Compound tûr chin an teh lai pawh kan hmu reng a. Mizoram buai lai a ni a, Cachar-ah pawh Mizote tán fimkhur a ngai hle.

BOYS HOSTEL: *Hostel* naupang hian páwn lam tlángval thurualpuiin Compound-ah buaina an siam nasa hle mai a. Zú in nân an hmang a, páwn lama

hmeichhe awm tha duh lote lâk luh nân an hmang a. A chángin Compound chhúngah bégchhéng siamin an ri dur dur a, zân rei tak tak thlengin an awm thin. Tu mahin kan hau ngam ngai lo va, kan tawngtai thin a ni. “*Rulin ‘ka mei rap sela, chuk ila’ tih hi an awm dân chu a nih hi,*” kan ti thin. *Hostel* khàr a tul si a, kan buai ngei dawnin kan hria a, kan huphurh hle a ni. “*Lalpianga hi engah nge hetah a lo awm?*” an ti thin a, Silchar Bengali Kohhran mite

chuan, “Anmahni thua lo kal an ni lo va, kan mamawh avānga kan koh thlākte an ni,” tiin an chháng thin.

Kan ngaihtuahna pakhatat chuan *hostel* kan khàr dawn chuan ‘*Compound chhúngah hian kan buai mai ang à; Sawrkar lam hian min khàrsak zāwk mai dawn em ni ang?*’ tih ngaihtuahna te kan nei thin. *Hostel* hi khàr tula kan hriat avāngin Mizo Synod lamah kan thlen ta a. Mizo Synod kal tlāngin, Assembly Executive Com-mittee-ah kan thlen a, Committee chuan Silchar Mission Compound-a *hostel* khar mai tha zāwka a hriat avāngin khar theihna thupêk a lo awm ta a.

Hostel chu July 1976-ah khar a lo ni ta a. *Hostel*-a awm zawng zawng chu hemi hma hian chhuak vek tura puan a ni a. *Hostel* naupangte chuan buaina siam an tum hle mai a, mahse July 1976 aṭang khán India ram pumah Emergency puan a ni zui ta a. Kan *hostel* naupangte pawh eng mah buaina siam lovin an chhuak zo ta vek a, a mak kan ti hle mai.

COMPOUND A DANG-

LAM DÀN: Kum 1976 July thlaah khán Cachar-ah tui a lo lian a, Silchar-ah pawh nasa takin tui a lian a ni. Mission Compound-ah pawh mi tam tak an lo lût a. Keinin theih ang angin kan lo buaipui a, Sawrkar lam aṭanga ṭanpuina lo kal pawh tha takin kan lo sem thin a ni. Hetih lai hian páwn lam mi lo lût thinte pawh an lo lût thei lova, *police*-in min veng (*duty hnan*) tlat a ni. Hemi denchhen hian remchāngah hmangin Mid-Mission Sáp Carlos-a hovin, “*Thingtlānga buh tiak sem tūr i kui ang,*” kan ti a. Anni lamin buh chí an rawn tum a, a zawl lai zawng zawng kan chêk let ta vek a.

Chumi hnu-ah chuan buh chin theihna zawng zawngah buh kan ching ta a. Buh tiak chu thing-tlāngah kan sem ta vek a ni. Buh kan seng zawn hian lian pui puiin lei kan chêk let ta a. Kum 1977 Kum Thar Ni-in Mizo leh Vai Kohhranin bial tlāng kan siam ta vak mai a ni. Tui lian hi Pathianin Compound humhalhna hmanrua atán

a lo hmang reng mai hi a mak hle mai.

BANGALOW-PUI, TUNA BIAK INA HMAN LAI HI:

Kum 1967 aţang kh n SIB Office at n luaht r a ni a, lua hman pawh thla tin ₹ 300/- an pe ve  thin. Neih hlen tum n hma an la a, keinin Biak Ina hman kan duh av ng n chhuaht r kan tum a. Chhuaht r tum n theih ang ang n hma kan la z l a, lehkh a te kan pe  thin a. Anni lahin chhuah an tum lo hle baw k si a. A hnu deuhah phei chuan thla tin n lehkh a kan pe ta a. Synod tin a tang n theih ang ang n hma kan la ta a. Mizo Synod, Khasi Synod, Manipur Synod leh CHT Synod ten  tan an la nasa hle a ni.

Heti  lai hian Manipur-ah Pu Lalbiak-thanga IAS, Mizoramah Pu Ro thuama MP, Silchar-ah Bengali leh Delhi-ah Mizo Kohhran ten Home Ministry-ah theih ang ang n kan sawi hlawm a. Hmun hran hran a tang n Kohhranhote an  awng  ai nasa baw k a, kum 1978 August ni 1-ah an chhuak ta a ni. Silchar khawpui

chh n ga Kohhran hrang hrangte chuan infinin Pathian hnathawh ropui tak av ng n thingpui ruai kil hov n l wm thu sawi  awng  aina te kan nei a ni.

SILCHAR BUAL: Mizoram lamah Vai SDO thah a nih av ng n Silchar Vai an thinrim hle a. Ni 15 June, 1979-ah Vai thinrim chuan Mission Compound-a Mizo awmte chu rawn luh chilhin an rawn bei ta vak mai a. Vaihov n an rawn tum chu keimah leh kan Bangalow lua h lai rawn tihchhiat a ni a. Bungalow pawh vawi thum lai h l tum n khawnvartui n  n an theh a; mahse naw-alh an lo neih loh av ng  leh sipai Officer, Bangalow hnai a awmin an rawn hau  av ng n an h l ta lo. Mission Compound-a Synod Guest House pawh hemi ni hian an h l a ni. Guest House-a Mizo mikhu l awmte pawhin kut an tuar hlawm. Kan awmna Bungalow h l tuma an beih lai chuan SR Upadhei, Office Worker chu Verandah-ah a lo awm a, ani chuan, “*Rev. Lalpianga a awm taw  lo, a chhuak daih,*” tiin a lo

chhang a. Choka lamah pheiin Lokhi, Bangalow-a awm ve pawhin ka awm tawh loh thu a lo hrilh a. Gas Cylinder an en leh a, a lo ruak hlah mai a. Motor khawih an tum leh a, Driver-in a lo tlan chhuahpui hman hlah a, Police compound-a a lo dah a.

Hemi ni hian Aizawl lam biak pawhna pawh an tichhe nasa hle a, keini hi tihchhiat lohvin a lo awm hlah mai a. Aizawl lam be tûrin *telephone* kan hmang dawn a (*chutih lai chu Ramthar Inkhâwmpui lai a ni a*). Rev Thangdelan *phone* hmang tûra a khawih chiah chu kan inbe nghal thei ta a. Thil awm dân te ka han hrilh chuan inkhâwmpuiho chu nasa takin an lo tawngtai nghal a, a mite tawngtaina Pathianin mal a sâwm a ni tih Chiang takin kan hmu nghal a ni. Bungalow-pui (*SIB chhuahsan*) pawh hâl an tum a, nasa takin lungin an vawm a, thil pawh a chhe nual a. Chutia hâl an tum chu Kristiante leh Police-te tangrualin an lo dang thei ta hrâm a ni. Ka thlir dân chuan tui-pui râl a tangin Chanchin Tha an rawn thlen a, ram an

rawn din hi Pathianin a chhiat a phal lo va; a hnathawh mak tak hi kan hmu thin a ni.

Silchar buai laia min vengtu BSF hotupa ber chuan Bungalow-pui chu luah a tum a, keiin ka phal si lo va. Ani chuan, “*India President-in direct-a a lâk ka nih hi,*” a ti a. Keiin, “**Chung lama miin direct-a a lâk ka nih hi,**” ka ti ve tung si a. Kan inchhan dân hi han ngaihtuah lêt chuan a mak angrengh hlein ka hria.

Hetieng tak hian harsatna tâwk mah ila, kut ka tuar miah lo mai a. Mission Compound humhalh chung-chângah hian Silchar Bengali Kristiante an tang nasa a, boruak eng emaw a awm pawhin an rawn tlan lût vat thin a ni. Dr. Nghaka te, Pu Saizuala S.I te an tang nasa hle bawk.

School hi kan chhuk hlim chuan Bengali Medium a ni a, sikul naupang tlênte chauh an awm a, chu chu English Medium-in kan thlâk a, sikul hmingah hian **Oriental English Medium**

School kan ti ta a ni. Kan sikul hi sikul tha tak mai niin, heta tang hian thalai eng emaw zatin an lo zir chhuak tawh a ni. Hêngte hian kan kâr boruak a siam tha hle bawkin ka hria.

Tûnah hian Pathian kaihhruaina avângin Bible-in mihring damchhan tùr a tih chu ka lo thleng chho ta reng mai a. Silchar-a ka awm thlâk hlim chuan dama ka chhuah theih pawh ka ring phâk ngai lo a ni. Pathian hruaina hi a makin a ropui ka ti hle a ni. Lalpa chu fakin awm rawh se.

KARIMGANJ MISSION COMPOUND: Hmeithai dah khâwmna hmun tùra Miss Rowland-in a siam a ni a. Hmeithai châwmtu nei lovin awm khâwm nân an hmang a ni. A ram pawh hi zau tak a ni a, kan hloh then nual hman a ni.

He Mission ram hi Cachar DC-in neih tumin min chuh buai thin a. Thubuai a awm tâk avângin kei pawh hemi chung-chângah hian Guwahati thuneitu sang zâwkah te ka zuk buaipui

thin a. February 1986 khân kan tifel thei ta a. Sikul dinna tùrin lungphum kan phum a; tichuan Cachar ram chu hemi kum (1986) hian kan chhuahsan ve ta a ni. Tûnah chuan he sikul hi sikul tha tak, zirlai pawh thahnem tham tak a lo ni ta a ni.

TLÁNGKÂWMNA:

Cachar ramah hian 1974 April thla a tanga 1986 February thleng kan awm a. Kan Mission ram hi a lo ram nasat tawh êm avângin páwn lam mi tan pawh zuamawm khawpin a lo awm a. Hemi hun chhúng hian Court-ah vawi tam tak kan kal a, beidawn rum rum cháng pawh a awm a ni. Kan chhuahsan dawn hian kan thubuai a fel hman vek a ni.

Missionary-ten an chhuahsan hnu hian Rev. Zairema (L) khân Assembly remtihna Synod tinah thawhlâwm a díl a. Chumi thawhlâwm tling khâwm chuan Compound hi RCC-in a hung ta vek a ni. Pathian kaihhruaina kan dawng nasa hle mai. Kan lâwm hle a ni. Lalpa chu fakin awm rawh se.

RAMTHAR FEH

1.

- 1. Field Hming** : Tripura Field
- 2. Khaw Hming** : Dingarai (Udaipur Pastor Bial)
- 3. Tlawh hun chhûng** : Ni. 30.11.2015 - 5.12.2015
- 4. Tlawhtu** : Electric Veng Kohhran Ramthar Comt.
- 5. Kal zât** : Mipa - 19, Hmeichhia - 3 = 22
- 6. Tlawh chhan** : Hnathawh
- 7. Hnathawh** : Biak In sak (24 x15 ft), Bathlar (6x10ft)
- 8. Senso zât** : ₹ 1,20,120/-
- 9. Làwmawm lam:** Ni 30 (Thawhtanni) zing dár 5:30-ah kan Biak In kawmthlang aţangin kan chhuak a. Pathian hruainain Dingarai (Reang khua) chu zân dár 11:20-ah kan thleng a, thawktute nèn kan inhmu chu kan hlim tlang hle a ni.

Ni 1.12.2015 (Thawhle hni) zingkar aţangin Biak In sak hna chu kan thawk ţan a, tlai lamah a hmuh theih chhûng kan thawk a. Tluang taka thawkin ni 3.12.2015 (Ningani) tlai-ah kan zo hman a. Kan zawh fel hian Bialtu Pastor Kiran Debarma kaihhruainain Upa H. Lalrammawia, Chairman Electric Veng Ramthar Committee-in hawngin Pathian hnênah a hlan nghal a ni.

Dingarai Kohhranah hian member-32 an awm a, Biak In thara inkhâwm hmasak ber zân hian mi pakhatin Baptisma a chang a. Kohhran pawl dang (Baptist Kohhran) aţangin mi pahnih an rawn lût bawk a; tichuan, member zawng zawng hi 35 an tling ve ta a ni. Kan chàm chhûng hian ringlo mi Reang (an fate nupa chiah Kristian) te inah kan thleng khâwm a. Hmun hrang hranga thawktute nèn kan khawsa ho va, kan hlim tlang hle a ni.

- 10. Report ţul dang:** Ni 4.12.2015 (Zirtawpni) zing dár 6:00-ah Dingarai aţangin kan rawn haw a, Agartala-ah

Synod House kan tlawh a. Tûkṭhuan kan ei khamin hnuin kan kal leh a; zàn dár 8:30-ah Noagong kan thleng a. Thawktuten zo taka min thlengin kan riak a, an chungah kan lawm tak zet a ni. Pathian hruainain ni 5.12.2015 (Inrinni) tlai dár 6:00-ah Aizawl tuang takin kan thleng a ni. Lalpa chu fakin awm rawh se.

P. Muana Ralte, Ramthar ziaktu

2.

1. **Field Hming** : Home Mission North
2. **Khaw Hming** : Bualpui
3. **Tlawh hun chhûng** : Ni 14 – 16 April, 2016
4. **Tlawhtu** : Tuikual Pavalai Pawl
5. **Kal zât** : Mipa – 19
6. **Tlawh chhan** : Hnathawh
7. **Hnathawh** : Thawktu *quarters* (18x36ft) sak
8. **Senso zât** : ₹ 18,865/-
9. **Làwmawm lam** : Ni 14 zing dár 6:00-ah Upa F. Kamhmungan ṭawngṭaiin min thlah a; tuang takin zing dár 8:15-ah kan thleng. Pu C. Lalzawmliana, Director hovin thawktuten min lo hmuakin, tûkṭhuan min lo buatsaihsak a; tûkṭhuan ei khamah hna kan ṭan nghal. Insakna châte awm sa a nih avângin hna hi chak taka thawh a ni a. Kan in sak hi a chhuat lei; a *skirting* leirawhchan (*an rem sa*); a bang *tile*; a chung rangva leh a *ceiling tile* a ni. Ni 16 chawhnu dár 2:45-ah kan sa zo thei a ni. Làwmthu sawi ṭawngṭaina hun kan hmang a; Inrinni a nih avângin hemi tlai lam dár 4:00-ah Bualpui chhuahsanin Aizawl kan pan a, zàn dár 6:30-ah tuang takin Aizawl kan thleng a ni.

10. Report ṭul dang: Work Camp kan neih chhúngin thawktute inah kan thleng dárh a, hneh takin min mikhual a, kan làwm hle. Thawktute hian hnatlengin min pui nasa hle bawh a ni. Ni 16 zing dár 4:00-ah kan

treasurer, Pu F. Vanlalruata (Work Camp-naa kal ve) nau thih thu kan hria a; a pawl kan ti hle. Khaw kár kawng a hla lutuk lo bawh a, amah leh mi dang pathumin zing kárah a vuinaa tel túrin min hawnsan a ni. MDTC, Bualpui hi kan lo la hmelhriat vak lo hle a; a lo tângkai hle mai si. Tún aia tângkai zâwk leh ngelnghet zâwka chei zêl ni se a duhawm hle a ni.

H. Lalfakzuala, Ramthar Ziaktu

3.

1. **Field Hming** : Home Mission South
2. **Khaw Hming** : Tuidangchhuah leh Hruitezawl
3. **Tlawhtu** : Electric Veng Kohhran, Lunglei
3. **Tlawh hun chhûng** : Ni 14 – 19 April, 2014
5. **Kal zât** : Mipa – 9
6. **Tlawh chhan** : Hnathawh leh Good Friday hmanpui
7. **Hnathawh** : Sikul dawhkan siam leh *quarters* thawm that
8. **Senso zât** : ₹ 26,493/-
9. **Làwmawm lam** : Ni 16 & 17 chhúngin sikul naupang dawhkan (6 ft), lehkhaw dahna awm, 20 leh thawktute hman túr dawhkan (2x3 ft), pahnih (2) kan siam zo. Hei bâkah hian *quarters* pahnih thawm that ngai zualpui pawh kan thawm tha bawh.

Maundy Thursday zân leh Good Friday chhùn leh zânah Khumi (Rakhain) naupangten, “A saw raltiang tlângah Kraws hlun tak chu a ding” tih Mizo tawng ngei main thiam taka an sa dal dal chuan thinlung a khawih ngei mai. Chawhnu hian Kaki Vengthar, Presbyterian Kohhran chauh lo chu Kohhran dang awm ve an phal lohna khua kan tlawh. Kawng mumal an neih loh avangin lui dungah Lawngin kan kal a ni. Thawktute nèn kan inkawm hovin kan hlim tlâng hle a, kan tawngtai ho zawhah kan kir leh a ni.

Kan kal lam leh haw lam min veng, khaw lum tak (41/42°) hmunah tuang taka hna kan thawh theih avàng leh Good Friday pawh Kohhran mipuite nèn hlim taka kan hman theih avàngin Pathian chungah kan lâwm êm êm a ni.

10. Report ùl dang: Kaki Vengthar hi In 48 niin Presbyterian Kohhran vek an ni. Missionary Supporter Society, Aizawl atanga Voluntary – hmeichhe 5-ten inpe taka sikul an lo enkawl te; Tuidang, Hruitezawlah Kohhran mipuite mamawhna avànga sikul dina, Nursery – CI VIII thlang mai Voluntary – hmeichhe 4-ten indaih lo tak, ùhahnemngai sia an lo enkawlte hian min tilâwm êm êm a ni. Sawi hmaih kan phal loh, Laldusaka, SMB, Health Worker leh a chhúngte inpêkna a ropui a, an inah kan riak khâwm ùhin.

Hruitezawl leh Kaki khuaahte hian Rakhain hnam an cheng deuh ber a. Buddhist sakhaw zuitu an la tam êm êm a ni. Pathian Ram a thlen zêl theih nán ùawngtaipui an ngai hle. Tuidangchhuah sikulah naupang an pun belh ve zêl avànga an sak belh sikul hi a bang dâp, a chung siallu hnah mai a ni a, a chhe tawhin a far nasa êm êm a ni. Sikul chung ùha an neih vat theih nán leh thawktuten tlawmsan mai lova inpêkna ùhuk zâwk nèn ùan an lâka, an hnathawh Pathianin mal a sawm zêlna ùur leh Bialtu Pastor tánte i ùawngtaipui ùhin ang u.

H. Vanlalhnèma, Ramthar Ziaktu

4.

1. **Field Hming** : Home Mission North
2. **Khaw Hming** : Rajiv Nagar
3. **Tlawh hun chhúng** : Ni 6 – 8 May, 2016
4. **Tlawhtu** : Ramhlun Kohhran Pavalai Pawl
5. **Kal zât** : Mipa – 27; Hmeichhia - 3
6. **Tlawh chhan** : Hnathawh

7. Hnathawh : Ei rawngbàwl (Chakma Convention)

8. Senso zât : ₹ 44,050/-

9. Làwmawm lam : Bialtu Pastor-in kal dawnah ùawngtâin min thlah a, tuang takin ni 5 (Ningani) tlai lam dâr 5:00-ah Rajiv Nagar kan thleng. Thawktuten hlim takin min lo dawngsawng a, iptepuì banna tùr min siamsak thlap a. Zàna riah khâwmna tùr min lo buatsaihsak bawk a, thawktute inpêkna nasatzia kan hmuhin zir tùr tam tak neiin kan inhria.

He Convention hi Synod Mission Board programme a nih avângin Executive Secretary i/c Mission leh Coordinator, SMB te pawhin an rawn hmanpui hial a ni. Speaker atân Pastor Sujindro Chakma i/c Damdep II Bial hman a ni.

10. Report ùul dang: Tùn ùum kan Work Camp hi Convention hmangtute ei rawngbàwlsak a ni ber a. Convention hi Biak Inah hman a ni a; Fellowship-na erawh chu Rohmingthangi Memorial School a ni thung. He sikul hian fak pawh a phu hle mai; an enkawl ulukin an tifai êm êm mai a, Mamit District chhúnga sikul fai ber lawman pawh an dawng hial rêng a ni.

He Chakma Convention hian danglamna tak (*record break-na*) a nei tlat mai a; chu chu lirthei pun khâwm tam ber ùum a ni, an ti (*Palai rawn kalna lirthei 24 lai a aum a ni*). Mikhual hi chhinchhiah dànin 272 an ni a, ruai ùehh hi mi 400 vél kan ni tlangpui ùhin. Pastor Zonunsangan Tuipuibari Centre aùangin a bial a. Thawktute inpêkna leh inlungualna a ropuiin fak an phu hle mai. Rajiv Nagar Kohhranah hian Dan zawhkim 96 chauh an awm chungin hneh takin Convention an thleng thei hi an fakawm tak meuh meuh a ni. Convention chhúng hian vawk 2 kan talh bawk.

A tawp berah chuan Rajiv Nagar khuaah hian ringlo (Chakma) 4,000-5,000 an awm a, thawh tùr a la tam hle mai. Kan ãawngtãinaah i hre reng ang u.

H. Zothanglura, Kohhran Pavalai Ziaktu

5.

1. **Field Hming** : Home Mission South
2. **Khaw Hming** : Hmawngbu
3. **Tlawh hun chhûng** : Ni 10 – 16 May, 2016
4. **Tlawhtu** : Bawngkawng Chhimveng Kohhran
5. **Kal zât** : Mipa – 17; Hmeichhia - 5
6. **Tlawh chhan** : Hnathawh
7. **Hnathawh** : Biak In sak
8. **Senso zât** : ₹ 1,15,862/-
9. **Làwmawm lam** : Ni 10 zing dár 6:00-ah Aizawl ațangin Sumo pathumin kan chhuak a. Lawngtlai Synod Guest House-ah kan riak a, a tûk chawhma dár 11:00-ah Hmawngbu kan thleng. Thawktute leh Kohhran hruaituten min lo dawngsawng ãha hle. Kan chàm chhûng zawng Synod Home Mission School, Hmawngbu-ah kan khawsa a ni. Hmawngbu khua hi Tuithumhnar Pastor Bial chhûnga awm a ni a. Kan kal hun hi khaw lum vânglai tak a ni a, Biak In chhuat chhûnna tùr siamin zingah dár 5:00-9:30 leh tlaiah dár 3:00-5:30 hna kan thawk ãhin.

Vai mistiri an chhawr ãhin chu an rama a hawn lai a nih avângin rei tak Biak In sak hi an lo chawlhsan tawh a. An mamawh lai taka Biak In sak kan va pui thei hi thawktute leh Kohhranhote an lâwm thiam hle. Kan Kohhran thawh khâwm thawmhnaw chi hrang hrang ip 9, a ãul ang a mamawhte tân sem tùrin kan hnutchhiah baw.

10. Report ãul dang: Ni 14 (Inrinni)-ah Tuidangchhuah Kohhran kan tlawh baw a. Biak In *ceiling* siamna tùr, mi inpete thawh khâwm 12,200/- leh thawmhnaw chi

hrang hrang kan Kohhran thawh khâwm ip 9 leh Solar Lamp kan hlan nghal a, an lâwm thiam hle.

Hmawngbu leh a khaw thenawmah hian Mizo hnahtlâk – Khumi, Bâwm leh Zakhai te an chêng ber a. Tlawhtu an neih khât êm avângin kan va tlawh chhuak hi an lâwm hle a ni. Inrinni zàn ațanga Pathianni zàn thlengin Biak Inah hmel hmuh ngai loh, Lalpa hmangaihte nêna Pathian kan han fak ho chu a ropui kan va ti êm! Work Camp kan neih chhûng zawngin kan Kohhran leh khawtlangah chhiatna thleng miah lo leh motor rui buai awm hauh lova min hruaitu Pathian kan nei hi a thlamuanthlâk thin hle mai. Ni 16 zàn dâr 7:30-ah dam takin Aizawl kan thleng leh ta a ni.

Hrangzawna, Ramthar Ziaktu

6.

1. **Field Hming** : Home Mission North
2. **Khaw Hming** : Salem Boarding School
3. **Tlawh hun chhûng** : Ni 11 – 13 May, 2016
4. **Tlawhtu** : Dawrpui Vengthar Kohhran
5. **Kal zât** : Mipa – 22; Hmeichhia - 4
6. **Tlawh chhan** : Hnathawh
7. **Hnathawh** : Tui lâkna *pipe fit* leh tukverh siam
8. **Senso zât** : ₹ 36,391/-
9. **Lâwmawm lam** : Thawktuten tha takin min dawngsawng a, min duhsakna kawng hrang hrangin an lantir. Salem Boarding School hi Mizoram hmun hla tak tak ațang pawha rawn pantu zirlai thahnem tak an awm hian he sikul hlawhtlinna a târ lang âwm e.

10. Report tul dang: Helai hmun hlawhtling tak mai hi tihchangtlun deuh deuh atân a tha khawp mai. A hmun a zau thain a rem baw a; thil dang zirna te pawh dah belh zêl ni thei se a duhawm ngawt mai.

Zothansanga, Ramthar Ziaktu

7.

1. **Field Hming** : Barak Area
2. **Khaw Hming** : Lalcherra
3. **Tlawh hun chhûng** : Ni 9 – 12 May, 2016
4. **Tlawhtu** : Chanmari West Kohhran
5. **Kal zât** : Mipa – 18; Hmeichhia - 3
6. **Tlawh chhan** : Hnathawh
7. **Hnathawh** : Biak In bang leh Sikul bang thlâk
8. **Senso zât** : ₹ 69,099/-
9. **Lâwmawm lam** : Kan Biak In peng aţangin ni 9 zîng dâr 4:40-ah Upa H. Suanan ţawngţaiin min thlah thlap a; tuang takin zân dâr 6:40-ah kan thleng a. Kan kalna tûr tak hi Bus-in a thlen theih loh avângin thawktuten min lo hmuak a, kan thawmhnaaw zawng zawng min thiarpui vek a, an chungah kan lâwm tak zet a ni. Thawktute an felin an inpêkna a ropui hle. Kan thlen zân hian zanriah min lo buatsaihsak a, tui ti tak leh puar takin kan ei a, a lâwmawm hle. Thawktute an tlém (*Mi 4 chauh an ni a*) a, an indaih lo hle. Heti chung hian a ţul apiangah an che reng thei a, an fakawm tak zet a ni.

10. Report ţul dang: Kan hnathawh ber chu Biak In bang dâp chhe tawh tak te, a rel mawih tawh tak te leh a ban thlâk ngai apiang thlâk a ni a; a bang hi *tile*-in kan thlâk a ni. Sikul bang dâp pawh rangva-in kan thlâk a, room pahnih chhuat chu cement-in kan zut mamsak a, a skirting leirawhchanin kan thlâk bawk. Work Camp-a kalhote kan inlungual a, ţahnem kan ngai tlang bawk a; hnathawh a sâwt hle. Kan kal dawna kan hnathawh tûra kan ruahman aia tam kan thawk thei a, Pathian chungah kan lâwm hle.

Lalcherra Kohhranah hian member 40 leh Dan zawhkim 20 an awm a, ringthar 5 an awm bawk. An sikul pawh tûn aia ţha zâwk leh changtlung zâwk ni thei sela, sikul naupang pawh an ţahnem dawn hlein a lang. Ringlote pawhin an fate chu sikula luhtir an duh zêl

bawk si avângin zirna sikul hmangin Pathian ram a zau zêl dawn a ni tih a Chiang Khawp mai. Pathian ram a zau zêl theih nân an Kohhran leh sikul tichangtlung theitu tûr Pathian hnênah i dîlpui theuh ang u.

Lalthianghlima, Vice Chairman

8.

1. **Field Hming** : Home Mission South
2. **Khaw Hming** : Zawlpu
3. **Tlawh hun chhûng** : Ni 13 – 15 May, 2016
4. **Tlawhtu** : Mission Veng Kohhran
5. **Kal zât** : Mipa – 27
6. **Tlawh chhan** : Chhimbial Bru Convention
7. **Hnathawh** : Ei rawngbâwl
8. **Senso zât** : ₹ 36,391/-
9. **Làwmawm lam** : Palai hi 300-400 vêl ni tûra beisei a nih lain 610 an kal thei a. Kan Kohhran bâkah kohhran pawl dang – Bru Baptist Church (BBC), Baptist Church of Mizoram (BCM), Lairam Isua Krista Baptist Kohhran (LIKBK) leh Believer Church atangin he Convention hi an rawn hmang a. Buddhist eng emaw zât an rawn tel bawk. Hei hian Convention hlawhtling tak a nihzia a tilangin kan hria.

10. Report tûl dang: Chhimbiala Pastor bial pariat atangin palai an lo kal thei a. Speaker atân Pu K. Lalngaihawma, ‘Mi lungngaite thian Team’ Speaker hman a ni. Khaw lum leh mei sa kârah kan tih tûrte harsatna êm êm awm lovin kan tlingtla thei a, tisa leh thlarauvah kan hlâwk hlein kan inhria.

Vanlalhriata, Ramthar Ziaktu

9.

1. **Field Hming** : Barak Area
2. **Khaw Hming** : Karimganj
3. **Tlawh hun chhûng** : Ni 20 – 23 May, 2016
4. **Tlawhtu** : Armed Veng ‘S’ Kohhran Hmeichhia
5. **Kal zât** : Mipa – 5; Hmeichhia - 23

- 6. Tlawh chhan** : Thawktu tlawh
7. Hnathawh : Bible Tract sem
8. Senso zât : ₹ 83,157/-
9. Làwmawm lam : Sumdawng motor-ten hna chawlsana sawrkara thil phût an neih lai a ni a. Zin tùra kan lo inbuatsaih hun a nih si avàngin CVJAC (Commercial Vehicles Joint Action Committee) hruaitute hnênah phalna (permit) kan dîl a, anni chuan harsatna min siam lovin kan dîl angin min phalsak a. Khawlai reh ruih maiah City Bus-a Kohhran Hmeichhe flag târa kan han tlan zur zur aţang khan kan lâwm êm êm a. Tluang taka kalin kan tumna hmun kan thleng a; thawktute zawng zawngin Pastor hovin min lo dawngsawng a, a làwmawm kan ti hle. Thawktute inpêkna avàngin Rowlands Memorial School tha tak, All Assam Board Exam-ah pawh result tha tak nei thin, Kohhran sikul kan hmuh hian làwmawm kan ti hle a ni.

10. Report tul dang: Baskatilla Preaching Station Biak In sak nân ₹ 25,000/- leh Baithakal Preaching Station-a damlo harsa tanpui nân ₹ 4,000/- kan pe a. He kan zin chhuahnaa kal ve chhúngkaw pakhat chuan Lokhi Bazar Kohhran Biak In dâr lei nân ₹ 10,000/- an pe bawk a ni. Zin chhuakte leh kan chhúngte pawh harsatna tâwk lova Pathianin min awmpuinaah lâwmthu kan sawi a ni.

Lalsangzeli, Kohhran Hmeichhe Ziaktu

SÀWMNA

Cachar Kahrawt Branch KTP chuan November 10 & 11, 2016 hian Diamond Jubilee a làwm dawn a. Cachar Kahrawt Branch KTP member lo ni tawh zawng zawngte chu he hun min hmanpui tùr hian kan sáwm a che u.

A lo tel thei tùr chuan a hnuaia mobile nambar tàr lanah hian minrawn hriattír thei ula, kan làwm hle ang.

Lalrawngbawla

Secretary

Mobile No: 08974637383

TV. ZOTHANSANGA (1984-2016) KAN THEN TA!

Tv. Zothansanga hi Pi Lalthuthlungi, Khawzawl Hermon Veng fa niin, July ni 23, 1984 khán Aizawl Civil Hospital-ah a piang a. Vânduaithlâk takin a nu hian a thihsan hma hlah mai a. A nu laizawn (nau) Pi Rengkhumi leh a pasal, Upa K. Ramliana-ten Chawngtlaiah la pheiin an fa tlum ber atán an enkawl ta a; Zova pawh hian a nu leh pa atán a thih ni thlengin a vuan ta a ni.

Zirna lamah chuan HSLC a ni a. Zai mi niin, mal zai leh zaipáwlah a thawh hlâwk hle a ni. Kohhranah leh khawtlângah a theihtâwpa inhmangin chanvo pawimawh tak tak a lo chelh thin a ni.

Kum 2010-ah khan Synod Mission Board missionary atána lâk niin ni 10.01.2011-ah a hna a zawm a. A thawh tirh atanga a thih ni thlengin Synod Home Mission School, Zomuantlangah Evangelist Teacher hna a thawk a ni.

Tv. Zova hi mi hlim thei tak, tlawmngai tak, thahnemngai tak leh rawngbawl naa mi inpe zo tak a ni. Pathian tih mi leh tawngtai taima êm êm, mi pawl sawi hlau tak leh mi dangte hriat thiamna ngah tak mai a ni baw. A nuna sawi hmaih hauh loh tùr chu – a hmasa bera Pathian a dah tlat mai hi a ni a; rawngbawl na atán chuan eng mah ui nei lo, ná pawh sawi ngai lo a ni.

Zomuantlang hi Thaidawr Pastor Bial chhúnga awm a ni a, an bialah hian Bial KTP Leader hmasa ber a ni nghe nghe. A thih thleng kháng hêng chanvo hrang hrang – Bial Standing Committee member, Bial Sunday School Secretary, Bial KTP Asst. Leader, Bial Zaipáwl member leh Branch KTP Leader hnate hi a chelh a ni.

May 2016-a Missionary Reatreat, ITI Veng Kohhran Biak Ina hmang tùra a rawn chhuah chhoh khán a insawisel tan a. Hritlang pangngai em maw intiin a hna a zawm leh mai a. Chuta tang chuan hritlang khuh anga awmin chaw a ei thei lo va. Aizawlah

rawn chho lehin Synod Hospital, Durtlangah a inentîr a. Hetah hian a lung (*heart*) lam tha lo niin, a lung dawt (*valve*) thlâk a ngai tih hriat a ni ta a. Doctor-ten a lung dawt thlâk a nih hmaa a mit (*eye*) zai tha an tih avângin chutiang tûr chuan buatsaih a ni a. Mahse, a taksa a chak tâwk loh avângin zai mai theih a ni ta lo va. Hemi hnu hian a lung tuamtu hi a lo têt a ni tih hriat a ni leh ta bawk a. Aizawl Civil Hospital-ah enkawl a ni a; hniam thla zêlin, ni 27.9.2016 chawhnu dâr 2:30 khân Krista pasaltha rinawm tak chuan natna awm tawh lohna ramah min lo kalsan ta a ni.

Zova hian a chauh viau tawh hnu (Ni 23.9.16)-ah khân amah enkawltu, a ú Ziri hnênah paper a dîl a. Chutah chuan **‘Thu awihna’** tih ziakin a hnuaiah chuan Hebrai 5:8 thu – **“Fapa meuh pawh ni mah sela, a thil tuarahte chuan thu awih a zir ta a ni,”** tih thu hi a ziak a ni. Thihna hlim kawr ruam a zawh lai pawhin Isua a en tlat a, rinawm takin a thih thlengin a zui a ni.

Kum nga vel lai a lo thawhpui, Zomuantlanga an Headmaster chuan, *“Tlangval ka hmuh tawhah chuan Zova hi a fel berin ka ring,”* tiin a thih hma daihin a chanchin hi a sawi nghe nghe. Thaidawr Bial Pastor chuan, *“Rawngbâwla chhuak tam tak an awm a, ani ang erawh hi chu an tam kher àwm lo ve,”* tiin a sawi bawk. Hêng chauh pawh hian Tv. Zova mizia leh inpêkna a tilang thui viau àwm e. Rawngbâwlanaa a inpêkzia leh rawngbâwlpui a nawmzia hi a rawngbâwlpuiten an hmuin, an nun a hneh hle thin.

A ruang hi an unauva an in luah, Aizawl Venglaiah lâk phawt niin, chumi hnua Chawngtlai panpui a ni a. A tûk (Ni 28.9.2016)-ah Bialtu Pastor Lalchhanhiman a vui a, kohhranhoten ui takin a hla duh êm êm – ‘Khawvêl hi bo mah se, Isua ka nei’ (KHB No. 150) tih hla sain missionary ropui tak hi an thlah liam ta a ni.

Synod Mission Board chuan Tv. Zothansanga hi a chhuangin a ui êm êm a; a kalsan tâk, a chhûngte a tuarpui takzet a ni.

DECLARATION

1. Title of Newspaper : Ramthar
2. Language in which it is published : Mizo
3. Periodicity of its Publication : Monthly
4. Printer's name : Rev. K. Lalrinmawia
Nationality : Indian
5. Publisher's name : Rev. K. Lalrinmawia
Whether citizen of India : Yes
Address : Synod Office
6. Place of publication : Mission Veng, Aizawl
7. Editor's name : Rev. Thangzauva
Address : Ramhlun South, Aizawl
8. Owner's name : Ramthar Association
Where printing is conducted : Synod Press
and premises on which
the press is installed : Mission Veng, Aizawl
9. Name & address of individual who
owns the newspaper and partners
or shareholders holding more than
one cent of the total capital : Nil

I, Rev. K. Lalrinmawia, hereby declare that the particulars given above are true to the best of my knowledge and belief.



Dated, Aizawl
the 1st Oct., 2016

(REV. K. LALRINMAWIA)
Signature of publisher

SMB RINGTHAR 2016

Sl. No	Field	August thleng	September thla	September thleng
1	Arunachal East	48		48
2	Arunachal North	117	14	131
3	Arunachal West	115	10	125
4	Assam	37		37
5	Barak	301	10	311
6	Delhi	32		32
7	Jharkhand	712	124	836
8	Karbi Anglong	67	83	150
9	Home Mission North	72	6	78
10	Home Mission South	198		198
11	Kolkata	451	26	477
12	Lucknow	236	30	266
13	Nepal	114	10	124
14	Odisha			0
15	Patna	207	25	232
16	Siliguri	85	3	88
17	Tripura	1084	188	1272
18	Masihi Sangati	1219	204	1423
	TOTAL	5095	733	5828



Unnao Pastor Bial (Lucknow Mission Field), Karimabad khuuah Pu Munna te chhungin Satsang inkhawm an rawt a. A pa nèn hian Baptisma an la chang lo va. Kan Biak In sak lai khán an pafa hian an rawn thawk char char a; Baptisma chang tùra sàwm apiangin "Túnah ni lo nakinah," ti hlin min chháng thin a, ka bei a dawng deuh hman a. A nu hi a chhul lam that lohna vângin kan Nurse, Siamtei te nupa hian Lucknow-ah te kalpuiin an buaipui a. A nu hi beisei phâk bâkin a dam ta mai si nèn, an lâwm êm êm a; Baptisma chan an duh ta a. Tih mai mai an duh lo va; an

chhúngte chah khâwmin, thawktute pawh a tam thei ang kal turin min sàwm a. Thingpui mai duh tâwk lovin, a kal zawng zawng ruai min thehsak a. An pafa chuan Baptisma an chang ta ni. An fate pahni, baptisma chang lo an la awm a. Tlangval pakhat hi hun rei tak rawn inkhâwm thin, Baptisma chang duh miah lo a ni a. Khawtlang leh college vèlah an hmuhsit hlauvin hun rei tak a ingaihtuah a, "Vawin hian Pastor, ka chang ve duh tawh e," a rawn ti bawk a, kan va lâwm êm! Keini aiin Vàn mite an lâwm hian kan ring a ni. - **BIALU PASTOR (OCL, '16)**

Postal Regn. No MZR/46/2015-2017

RNI Regn. No. 40889/88

Krista Pasalṭha -

TV. ZOTHANSANGA
(1984-2016)

Tv. Zova hi mi hlim
thei tak, tlawmngai tak,
ṭhahnemngai tak leh
rawngbawlnaa mi inpe zo
tak a ni. Pathian ṭih mi leh
ṭawngṭai taima êm êm, mi
pawi sawi hlau tak leh mi
dangte hriatthiamna ngah
tak mai a ni bawk. A nuna
sawi hmaih hauh loh tûr
chu a hmasa bera Pathian
a dah tlat mai hi a ni a;
rawngbawlna atân chuan
eng mah ui nei lo, ná pawh
sawi ngai lo a ni.



To



Rawngbáwltute rawngbáwltute:

Khatla Branch KṬP-ten Barak Area Mission
Presbytery (Pailapool Kohhran)-ah ei rawng
an bawlsak

If not delivered please return to:

The Manager
Ramthar Chanchinbu
Synod Office, Aizawl, Mizoram,
India. Pin - 796001

*Published by Rev. K. Lalrinmawia and Printed at the Synod Press, Aizawl on
behalf of Ramthar Association, Aizawl, Mizoram. Copies- 32,100*